

福建通紀卷十六

清六

仁宗嘉慶元年五月大學士閩浙總督福康安卒於軍

六月以魁倫爲閩浙總督姚棻護理福建巡撫

二年四月姚棻以疾免以田鳳儀爲福建巡撫

七月田鳳儀丁憂調費淳爲福建巡撫

九月增設福建運河鹽場大使

以汪志伊爲福建巡撫

三年五月免福建全省遠年逋糧

十一月魁倫丁憂以富昌署閩浙總督

四年三月以書麟協辦大學士署閩浙總督

諭前任閩浙總督魁倫因在福州將軍任內應賠短少關稅盈餘銀兩十

八萬六千兩零加恩寬免九萬六千兩零餘著照所請於應得養廉內分

半坐扣

七年十月以長麟爲閩浙總督

九年二月初石城等處匪徒滋事與閩界毗連閩浙總督玉德馳在建甯一帶查辦將首犯吳韜甯金鰲等緝獲到案

以上東華錄

初嘉慶四年閩浙海盜有安南大艇幫四總兵三十餘艘曰艇盜鳳尾水澳蔡牽三幫各六七十艘箬橫小幫浙盜二十餘艘附之時阮元爲浙江巡撫五年六月乘風勒兵擊之安南巨盜五六千人及土盜小船全蕩平于台州松門四總兵溺死者三礫死者一奉旨以總兵勅印擲還安南王阮光纘光纘言但令總兵巡海不慮其入浙爲盜上表謝罪自後安南夷寇不復入浙其在閩者皆爲牽所并牽同安人

一作漳州人

奸猾善捭闔能使

其衆既得夷艇夷礫大猖獗凡商船出洋者勒稅銀四百圓回船倍之乃免劫且結陸地會匪陰濟船械銷糴米糧而官修戰艦笨竄不能放洋轉雇商船爲勦捕之用於是阮元率官商捐金十餘萬付李長庚赴閩造大

艦三十名曰霆船鑄大礮四百餘配之賊畏霆船甚厚賂閩商更造大於
霆船者先後載貨出洋僞報被劫牽得大海船遂能渡橫洋窺臺灣是年
五月復犯鹿耳門劫臺灣米數千石分濟粵盜朱瀆連舫八十餘猝入閩
閩師不敢擊會浙江總兵胡振聲以二十四艘運造舟木於閩閩督玉德
檄振聲擊之而閩師不援爲賊火攻所陷遂與同船弁兵八十餘人同時
死之詔逮不援臺之金門鎮總兵吳奇貴

弟子記作海壇鎮孫大剛

副將張世熊等治

罪孽經室二集聖武記雷塘菴弟子記雕菰樓文集

初浙江巡撫阮元與閩省督撫會奏請以李長庚爲總統一提兩鎮不分
閩浙嚴拏海盜蔡牽摺略曰應請令浙江提督李長庚爲總統帶浙省兵
船二十隻浙江温州鎮總兵胡振聲福建海壇鎮總兵孫大剛爲左右兩
翼各配船二十隻共船六十隻其未經飭調者仍各領兵船在本汛巡緝
如遇提督追賊至境一體策應六月命下而振聲已死

八月提督李長庚率四鎮兵船攻蔡牽於定海北洋獲船一隻礮沈一隻

礮幾及牽生擒黃奎等五十二人朱瀆船被勦多傷遂與蔡匪分散遁回閩廣賊勢益孤初胡鎮軍陣亡後兩省兵氣大餒蔡匪復竄浙洋八十餘船復與粵盜朱瀆相合來浙其勢甚熾阮元與李長庚謀且勿輕擊俟各鎮兵船修調齊集乃於秋半合擊大破之

十年五月李長庚仍調浙江提督許文謨調補福建提督

以上雷塘菴弟子記

八月移漳州左營守備駐赤湖並添撥弁兵換防

十一年正月玉德奏稱蔡牽豎旗滋事自稱鎮海王於上年十一月二十三日搶入鳳山縣城經官兵攻散後賊船復駛入鹿耳門在府城外登岸劫擄並勾結嘉義縣匪徒洪四老等乘機滋事奉諭賊勢鴟張不得不大加懲辦所有軍火糧餉器械船隻等項照軍興例動帑經理一切均責成玉德不可稍有貽誤又諭賽冲阿久歷行陣於勦捕事宜素爲諳練見發去欽差大臣關防一顆交該將軍行用不拘何處接奉此旨卽由該處馳驛前赴閩省玉德見駐之常武海口於該督豫備兵力內擇精練強壯者

帶領放洋悉力督勦該處提督自李長庚許文謨以下各將弁均受該處
軍節制調撥

免蔡牽滋擾之臺灣府屬地方額賦

以魏元烺爲福建巡撫

三月臺灣鎮總兵官愛新泰等奏攻克洲仔尾等處賊寨

命百齡赴福建襄辦軍需

愛新泰奏克復鳳山縣城得旨嘉獎賞雲騎尉世襲

五月諭有人奏鴉片煙積弊請杜絕來源據稱洋船私帶煙土其銷路如

福建之廈門等處每年紋銀出洋不下數百萬以內地有用之財易外洋

害人之物流毒無窮著通飭各直省督撫設立章程嚴行查禁

以上東華錄

初詔責總督王德歷年廢弛致賊氛日熾且福建水陸官兵七萬有餘調

渡臺者不過三四千豈能滅此二萬有餘之賊特命成都將軍德楞泰佩

欽差大臣關防調四川兵三千赴勦將軍賽冲阿副之會蔡牽爲李長庚

敗走乃罷德楞泰之行惟賽冲阿至臺灣先是賊塞鹿耳門惟二汕二港
尚通小舟長庚扼南北二汕外別以小澎船五十令總兵許松年王得祿
由大港繞安平港入攻之焚獲三十餘船俘賊千餘水陸並進連五戰皆
破賊二月朔復盡焚洲仔尾之柵與南汕來襲之船賊大敗困守北汕如
獸在阱會七日風潮驟漲北汕所沈舟爲風浪掀起漂去賊奪門出官兵
追截其船十餘卒以閩師不助扼各港長庚所將水師僅三千餘故賊竟
遁去長庚奏言蔡逆未能殲禽者實由兵船不得力接濟未斷絕所致臣
所乘之船較各鎮爲最大及逼近蔡牽坐船尙低五六尺其餘諸鎮之船
更爲不及曾與三鎮總兵願預支養廉捐造大船十五號海門金壇二鎮
亦願捐造十五號而督臣以造船需數月之久借帑四五萬兩之多不肯
具奏且海賊無兩載不修之船亦無一年不壞之槓料桅柁折則船爲虛
器風蓬爛則寸步難行乃逆賊在鹿耳門竄出僅餘三十船蓬朽硝缺一
同閩地裝蓬燂洗煥然一新糧藥充足賊何日可滅五月上禡王德職逮

問治罪以阿林保代之閩文武吏以不協勦不斷岸奸懼獲罪交譖長庚於阿林保阿林保三疏密劾之浙撫阮元以憂去上密詢浙撫清安泰清安泰奏言長庚熟悉海島形勢忘身殉國故賊中有不畏千萬兵只畏李長庚之語實水師諸將冠奏入至是八九兩月上切責阿林保甫蒞任旬月卽專以去長庚爲事倘朕輕信其言豈不自失良將嗣後勦賊事責成長庚一人阿林保倘忌功掣肘則玉德卽其前車之鑑並飭造大同安梭船六十號其未成以前先雇大商船備勦

聖武記

十月起阮元署福建巡撫

東華錄

阮元以病解任調張師誠爲福建巡撫

上全

李長庚追蔡牽於粵海殲其姪蔡天來之船

聖武記

李長庚擊蔡牽於閩之浮鷹島

上全

十二月改福建糧儲道爲分巡甯福海防兵備道移駐福甯

十二年二月移建福建鳳山縣城

以程祖洛爲閩浙總督

七月賑澎湖廳風災緩徵新舊額賦及雜款銀

九月福州將軍賽冲阿奏官兵在雞籠洋截勦朱潰大獲勝仗得旨嘉獎

以上東

華錄

十二月浙江提督李長庚勦賊蔡牽於黑水洋死之長庚率福建水師提督張見陞等追牽窮其所向至黑水外洋牽僅三舟長庚擊破牽舢蓬又自以火攻船維其後舢賊急發舢尾一礮長庚中喉而殞張見陞望總統船亂遽麾舟師退牽乃遁入安南事聞朝廷震悼追封壯烈伯謚忠毅命原籍同安縣立專祠以裨將王得祿邱良功嗣其任勉以同心敵愾爲長庚雪讎

雷塘菴弟子
記聖武記

撥浙江江西倉穀二十萬石浙江沿海州縣漕米十萬石接濟福建民食

東華

錄

十三年閩浙總督阿林保奏拏獲蔡牽義子蔡三來等上

七月浙江副將項統會同閩師由閩回浙在韭山洋遇朱潰攻之獲船一隻生擒七名朱潰卽竄回閩旋被閩總兵許松年轟斃其弟渥代領其衆

雷塘菴弟子

記聖武記

八月蔡牽竄回閩提督何定江窮追入閩

雷塘菴弟子記

浙洋鳳尾幫盜首張阿治母弟皆在福建惠安縣總督阿林保繫其母弟阿治屢被浙江勦感乃率餘盜四百七十餘名難民九十八名礮八十六門赴閩投誠

全上

十四年正月諭阿林保等覆奏查明泉州糧價較貴緣由據稱漳泉地方向賴臺米接濟近年洋匪未靖臺灣商販較少泉州米價稍昂委無通盜濟匪情事見在蔡朱二逆常到淡水一帶劫掠商船該逆劫得一船卽用之不盡往往放回勒贖其無須內地米糧已可概見等語杜絕接濟一事食米最爲要務該督撫等頻年查辦海口接濟於臺灣販米從未加意籌及何以杜絕孽芽使之淨盡務卽妥辦以清盜源又另片奏查勘蛤仔欄

地勢番情另行酌辦一節蛤仔欄北境居民見已聚至六萬餘人且於盜匪窺伺之時協力備禦幫同殺賊實爲深明大義自應收入版圖豈可置之化外況其地膏腴素爲賊匪覬覦若不官爲經理妥協防守設竟爲賊匪占踞豈不成其巢穴更爲臺灣添肘腋之患乎著該督撫熟籌定議應如何設官經理或用文職或駐武營隨宜斟酌期於經久盡善爲要再梁上國摺內敘及蔡逆賊船進至蘇魯港之時先已率衆上岸有該處番人與鬪居民吳氏擒獲數賊始驚潰而去嗣朱逆復又竄往亦經居民與官軍夾攻敗賊等語該處居民見官兵勦賊卽知如此出力著卽詳查加之

獎賞

東華錄

八月浙江提督邱良功福建提督王得祿海壇總兵孫大剛黃巖總兵童鎮陞探知蔡牽在甯波洋各兵船連夜接續向北初五日黎明童鎮陞首先追及守備武定太等攻獲一船生擒王烏等五十一名斬取首級十顆牽回衢港竄往外洋十一日牽由象山潭頭外洋往南提督邱良功等在

北洋搜尋無牽踪跡聞師回閩堵剿朱渥浙師專剿牽十五日由普陀挑帶兵船先後窮追南下十七日邱良功等追及牽於臺州魚山外洋乘上風攻擊賊船東南遁童鎮陞船被盜礮折桅王得祿舟師亦至齊攻斃賊無算十八日轉戰至温州黑水外洋閩浙船仍據上風台圍火攻牽坐船破漏沈海及其二妻一子同時斃没王得祿晉封子爵邱良功晉封男爵

學經室二集雷塘菴弟子記聖武記

案聖武記作牽自知無救乃舉礮自裂其船

十五年設噶瑪蘭通判自遠望坑迤北而東至蘇澳止計地一百三十里

沈文肅公奏議

十九年三月以陳預爲福建巡撫

五月以王紹蘭爲福建巡撫

二十二年三月以董教增爲閩浙總督

五月諭王紹蘭身任巡撫刑名案件是其專責此案朱履中誣訐道府收

受陋規藩司李賡芸被偏自盡固由於汪志伊刻覈苛求王紹蘭係同審之員果能持正商阻汪志伊或不偏執已見涂以輒必不敢肆意陵偏李賡芸亦不至憤激輕生卽或汪志伊執拗難回王紹蘭儘可據實單銜陳奏乃一味隨聲附和釀成巨案實屬溺職王紹蘭著照部議革職

以史致光爲福建巡撫

東華錄

二十四年五月調李堯棟爲福建巡撫

六月以吳邦慶爲福建巡撫調李堯棟爲湖南巡撫

九月調韓克均爲福建巡撫

東華錄

十二月諭董教增奏閩省廈門洋船請仍販運茶葉一摺所奏甚屬非是

前閩浙等省販粵茶葉多由海道運往經蔣攸銑以洋面遼濶漫無稽查恐有違禁夾帶等弊奏請仍照舊例改由內河行走業經明降諭旨通行飭禁自諭禁之後洋面日見肅清海口無從偷漏卽英吉利不能串通奸商私相售買亦皆遵奉約束爲法甚善今董教增忽請准廈門洋船仍販

運茶葉則與由海運粵何異明係受奸商慫恿冒昧陳請著不准行以上東華錄

宣宗道光元年二月免山西額解錫斤改派福建湖北辦解上全

九月罷福建荔枝素心蘭貢

皇朝年表

二年正月以葉世倬為福建巡撫

八月以趙慎畛為閩浙總督

三年正月葉世倬以年老休致調孫爾準為福建巡撫

四月免福建勦辦臺匪案內節次覈減攤扣未完銀一百七十九萬餘兩

申定廣東福建捉人勒贖治罪例

以上東華錄

是年臺灣鹿耳門內數十里海面忽變成陸地

後湘二集

四年五月諭趙慎畛閩洋米艇戰船緝捕不能得力全行裁汰

十月命臺灣道兼管臺營水陸官兵

以上東華錄

初總督趙慎畛以臺灣入籍一百四十年姦民十一一起浮動好亂生齒日

繁所在多遊手非械鬪則爲盜慎選守令以福州府方傳樞署臺守一時
臺灣道孔昭虔臺灣縣李慎彝鳳山縣杜紹祁嘉義縣王衍慶淡水廳吳
性誠噶瑪蘭廳呂志恆皆有聲五月間鳳山縣打鼓山鳴園竹生花七月
逢閏民間以爲昔林爽文反有此兆訛言閒起臺防同知缺杜紹祁代之
署鳳山縣者劉功傑也頗銳意捕盜未幾而許尙之事起許尙者鳳山廣
安莊人業賣板榔素結諸無賴羣盜悅之爲鄉保所告懼捕遂與所善蔡
雙弼張仔來高烏紫王曾楊良斌沈古老徐紅柑林溪及番人潘老通謀
反其黨甚衆期於十月十一日集議先攻下淡水縣丞署次攻埤頭遂及
郡城苦無貲先肆劫掠傳樞聞盜檄縣急捕尙將起事其莊人劉黃中微
聞其謀留諸家勸之不使尙出功傑捕尙及良斌不得焚其居跡至黃中
家十三日遂以尙獻械繫馳送于郡傳樞親訊之得其反狀言于鎮道曰
許尙之黨俱在事破必速亂埤頭無城不可守也劉令初仕其參將又懦
宜增兵防且臺地匪民所在嘯聚甚易曩者南路有事則北路起應北路

有事則南路騷動郡兵常苦爲所掣今宜及未起速備北路俾我得專力於南鎮道皆然之乃密飭嘉漳淡水爲備時苦積潦郡城嘉義城垣皆圯急繕治之而使紹祁偕縣丞丁嘉植都司翁朝龍以郡兵二百協守埤頭埤頭者鳳山縣治也舊縣燬于林爽文移治埤頭僅樹竹園又燬於蔡牽故慮之至則民間已紛言賊起爭避郡城然莫知賊所在營縣日出清莊捕賊十餘人最後得其軍師林溪許尙之被獲也其黨將散楊良斌不可衆乃推良斌爲首聚議黃梨山中良斌製刀杖旗幟使潘老通借礮於其舅番通事潘巴能以林溪爲軍師王曾爲都督領紅旗李川鄭榮春爲正副先鋒領烏旗蔡雙弼以下皆爲頭目分招賊衆期二十四夜攻埤頭戕官據地卽乘勝攻郡城使徐紅柑白臺濟沈古老白嘉義各招其黨並起又使吳賜潛入郡城結匪民內應約既定二十一日林溪至埤頭市五色綢製旗溪故縣中白役偵賊者也陰爲賊主謀官所往賊先知之故其謀甚密溪市得綢使人持往已將飯而後行其母詰知出首故獲之訊未卽

服良斌見獲溪不待衆集二十二夜遂以賊數百人分西北兩路攻埤頭殺苦苓門汎兵自竹圍隙處以入埤頭先有備紹祁功傑守縣署朝龍嘉植守倉賊先至倉朝龍揮兵擊之傷斃二賊賊燃大礮不震遂敗走其縣前賊已砍柵門將入亦爲鄉勇擊退參將某聞賊擁兵火藥庫不出翼日語朝龍曰賊雖敗必且大至埤頭倉署皆不可守火藥庫有土垣四西阻水昔蔡牽攻不能破可速據此朝龍惑之遂移兵入文官相率隨入民大惶懼奔逃姦人乘閒搶掠塘報兵又爲賊殺道路遂梗二十三日郡中聞警乃議昭虔慎藝以城守左營及安平水師兵守郡傳穉與署臺鎮趙裕福中營遊擊楊俊督師援鳳山許尙猶在府監斬之而後行時郡中訛言四起人心震駭紳士韓高揚黃化鯉等入見傳穉請方略傳穉曰鳳山雖一隅距郡城百里賊朝發可夕至也恐有姦宄應之宜固根本今郡城垣壞漏夜築之兩日可竣城內外街市多立木柵君等率丁壯隨李令日夜親巡城上分佈兵勇安平副將率水師六百人駐西城外螻蛄石以衛商

行爲犄角城內設勁兵三百人環甲露宿足爲策應各衙門及紳士家皆募鄉勇以收遊民無使助賊惟大兵南下賊必潰走當遏之勿使越入郡境已飭臺灣嘉義營縣分屯兵勇扼其要隘且令各莊耆簡壯丁相爲守援土賊不得往應則吾事濟矣或請閉郡八門曰不可南路難民避賊者日數千至不能無納且毋使北路謠傳郡城被困啟姦人心也道試甫畢各學官俱在率兵役守門稽出入而已衆悅守備遂嚴二十四日鎮將兵起傳穽部署畢二十五日亦以兵二百鄉勇二百繼之經阿公店南北適中地也民居頗稠留兵勇二百人使訓導謝代堦駐之以扼其衝道乃通二十六日至埤頭撤功傑使紹祁同任署鎮亦撤其參將以朝龍代傳穽乃督民夫增補竹園繞圍濬深溝中插竹籤招撫逃民諭各鄉守莊捕賊其先受賊約能自首者免罪紹祁更募鄉勇八百名以四百人守埤頭四百人偕官兵捕賊縣役中有通賊者不敢動而頗自危紹祁大度示之不復窮究反側遂安賊自埤頭走黃梨山豎旗招衆鎮將初至不測賊衆寡